



## Fasnacht pur als Wältkultur

Im Stadtmarketing rauche d Kepf,  
Si sinn am Hirne, die arme Drepf,  
Die Stadt kasch jo, so dien die dängge,  
Nimm verkaufe, die muesch verschängge.

Basel isch uff em Hund, s isch wiirgglig nit luschtig,  
Uff Basel wird kai Fremde me gluschtig,  
Ständig isch e Puff, well si alli Stroose uffrisse,  
Und uff der Kantonabangg, dien si au no bschisse.

### Buureregle:

Hesch als Banggroot s Barteibiechli derbyy,  
Kasch bim Kassier der Vorderscht syy.

Emene Buusefrind, dää kunnt au us em Oschte,  
Verschafft der Wessels e luggrative Boschte,  
Wäge dämm isch jetze unseri BVB zer Sau,  
Und die falsche Drämmli, griege mer au.

### Buureregle:

Bi Buusefrinde, jä sisch oft e soo,  
Ka der ainti blybye, der ander muess goo.

Der Wessels als Usshängeschild kasch nit verwände,  
Au der Morin isch nit z bruuche, dä sotsch verpfände,  
S Eveli duet greftig d Bangsionskasse frisiere,  
Der Baschi muess nit frisiere, duet aber an d Biire friere.

### Buureregle:

Trotz Cüpli z Moskau und z Shanghai,  
Isch der Morin unsere Glotz am Bai.

Der scheeni Christoph duet syni Harmos loobe,  
Und dermit Leerer und Kinder hailoos blooge,  
Der Conti verschwindet im aigene Schatte,  
Und der Brutschin isch iberhaupt kai Glatte.

### Buureregle:

Wotsch Basel als Wältkultur entdegge,  
Muesch zerscht unseri Regierig verstegge.

S Stadtmarketing muess sich ebbis yyfalle loo,  
Mit settige Figure kasch nit in d Wärbig goo,  
Si bruuche e Idee wu d Wält duet uffschregge,  
Um dermit ändlig d Basler Kultur zentdegge.

Villicht kennt me jo d Rambasse yspanne,  
Hänn ebbe die ächti Kultur in iirer Pfanne?  
„Mir häi kei Kultur, säge die, dasch aber kei Schand,  
Mir bruuche das nit, mir häi derfür e huffe Kulturland.“

### Buureregle:

Wenn der Rammelbuur uff em Agger stoot,  
Isch si Kultur s Ooberoot.

Aismool rief ain us der Rundi: „I han e Glanzidee,  
Ich wurd als Motto fir Basel, d Fasnacht gsee,  
Wemmer die als Wältkulturerb kennte aanebiege,  
Wärde die Fremde en Mass zuenis fliege.“

D Fasnacht wird denne international,  
Massehaft Thurische kemme vu iiberaal,  
Gsesch denne Chinese, Yankees und Spaniogle,  
Wo an der Fasnacht dien ummenander jogle

Drumm bruchts jetze Tribiinene uff de Brugge,  
Der Zeddel mues me uff Änglisch drugge,  
S gitt Eeredame fir d Franzose und d Schwoobe,  
Und sottis rägne, wird d Fasnacht verschoobe.

D Blagette kame jetze z New York kaufe,  
Wär äxtra blächt, darf inere Gugge mitlaufe,  
Am Änd hämmer denne ändlig au gnuet Koole,  
Um der Morgestraich am Donnschtig z widerhoole.

### Buureregle:

Lauf aini halber blut am Cortège ummenand,  
Kunnt si allwääg us em Schwoobeländ.

Liebi Sabine vum Stadtmarketing,  
I wais, d Fasnacht isch aigetlig nit so di Ding,  
Drumm wänn mir dirs jetze dittlig wisse loo,  
Als Wältkultur wämmer nit uff d Route goo.

### Buureregle:

Das Gschwätz vu dääre Wältkultur, macht mi sur.